

OPINION

Awor: Ban comporta!

Carnaval na Aruba, cu normalmente ta uni hende y ta procura pa un ambiente sumamente relaha, a conoce e añu aki tension, problema. E problema a haya caminda pa sigui crece, ora remedi no a worde poni ariba herida dor di esnan cu por a evita y despues siquiera remedia e situacion, cu ta Gobierno. Pero los di esaki mester mira bon kico a socede y cada uno tambe mester mira unda su parti di responsabilidad ta sinta y con e mes tambe mester aporta. Y pa haci esaki mester tene berdad y nada mas cu berdad, nos dilanti.

Raiz di e problema tabata, e buskeda di pida tereno pa pone trailer. Kico a socede? Esnan, cu semper a tene nan mes na e fecha estipula, den añanan anterior a bira victima di esnan cu semper ta hunga sabi y bula sali dilanti promer cu tempo. Esey a haci cu ningun hende kier a sali perhudica y unabez a bira conoci cu dos tres auto a worde poni ariba e ruta, e otronan no kier a keda atras. Resultado: confrontacion Pueblo y Polis, caminda algun hende no a tene nan mes na ningun limite. Por ehemplo: un persona, cu tabata mira vehiculo di Polis pasa e anochi cu henter e asunto a cuminsa, a dicidi di demostra ki vocabulario e conoce, banda di Papiamentu normal. Pakico? A surgi un problema enorme siman pasa y awor nos ta para na un punto, cu cada uno mester mira tambe su responsabilidad enfrente Carnaval cla!

Por ehemplo, e mezclamento den gruponan. Nos ta testigo di abuso cu ta socede cu participantenan. Hombernan burachi, cu aparentemente no conoce normalidad, ta trata di gara participantenan femenino. Abusadornan, cu ta pensa cu nan ta sobresali den abuso, despues cu aparentemente nan ta fracasa ariba tur otro tereno. Kico e resultado ta? Disgusto cerca e participantenan.

Tambe tin hende cu ta dicidi cu nan ta sinta na cas tranquilamente warda e ultimo hora pa nan bay Carnaval. Nan ta cana yega y ta kere cu manera nan yega, tur otro hende mester hala un banda pa nan pasa y para. Hendenan cu a kima den solo mester soporta con otronan tranquilamente ta bin para nan dilanti. Ta husto?

Na otro ocasion, algun hende ta dicidi di bay cana yena nan curpa cu alcohol y na ultimo momento ta dicidi di bay para caminda un grupo di hende drechi ta trata di diverti nan mes na forma sano. Na momento cu e grupo alcoholiza yega, e hende drechi mester move si e no kier ta participe di vulgaridad, di abuso, etc. etc.

Tin hende, cu ta dicidi cu ta Carnaval y cu nan no conoce Ley mas. Nan ta stuur fuera di conocimiento casi y no ta tene cuenta cu cuanto yiu di mama nan por mata. Ta Carnaval. Otronan ta core yega y pone nan auto na un caminda, cu mester keda habri. Esun cu habri boca ta haya su mes den problema. Si Polis intermedia, e mester soporta abuso, aunke ta su trabau e ta haci enbez di bay celebra Carnaval e tambe.

Durante e siman cu a pasa nos a sinti kico kier meen problema cu Carnaval y con nos mester di Carnaval pa diverti nos mes. Laga esaki duna nos estimulo pa cada uno tambe acepta su responsabilidad pa celebra un bon Carnaval, cu por duna bon resultado solamente, ora abusadornan keda cas; burachenan profesional bay busca palo di kwihi bandona den sabana pa nan bringa cune y ora abuso no worde cometi!

Comision di bon servicio institui pa Comisario di Polis

Comision a soluciona crisis di carnaval

ORANJESTAD(AAN)-- Despues di a ricibi varios carta di parti di diferente instancia, ayera Comisario di Polis Rasmijn a dicidi cu e momento a yega pa instala un Comision, cu a worde pidi pa busca un solucion pa e crisis cu a surgi den Carnaval. E decision di Comisario di Polis tabata basa tambe ariba e hecho cu SAC, di cual e Presidente a amenaza di retira si regresa na e promer ruta, a cambia di opinion.

Comisario Interino Rasmijn a bisa cu mirando cu el a ricibi un carta di SAC cu nan no ta sostene e acuerdo di e ruta cu a worde presenta mas, a dicidi di bolbe sinta na mesa y mira con cosnan ta sigui. Y mirando cu ta necesario pa yega na un conclusion a dicidi di instala cu un comision cu a worde yama bon servicio, consistiendo di Srs.


Hans Schnogg, di ATIA, Norman Kuiperi di Kamer van Koophandel, Sra. Adwina Arends di AHATA, Sra. Bertha Janga di grupo di Esso, Sra. Sylvia Laurens y di staff di cuerpo policial sr. Van Straten y Sr. Rack. Comisario Rasmijn alavez a gradici e personanan aki di den menos cu 2 ora a sa di responde ariba e yamada pa duna nan conseho.

Prome cu yega asina leu, Comisario interino a reuni tambe cu gobierno y gobiernu tambe a haya un bon idea di un comision. E resultado di e trabanon di e comision ta encera cu e ruta manera cu tabata e decision tuma for di 2 siman pasa, pero e otro cu a worde delinea ultimo tambe a cambia. Pues e ruta oficial ta un ruta caminda ambos partido ta haya un representacion den dje. E ruta cu un-

animamente a keda propone ta saliendo for di Wilhelminastadion, Fergusonstraat bin abao, drenta Vondellaan bay zuid, subi L.G. Smith Blvd, bay full abao yega te den Weststraat bira na man drechi drenta J.G. Emanstraat, bin ariba den verboden pasa den Van Leeuwenhoekstraat, Hospitaalstraat, dilanti La Fama, Adriaan Lacle Blvd. bira bay ariba Wilhelminastadion sigui bek pa Wilhelminastadion.

Comisario interino a bisa cu despues di tur e consehonan ricibi e tambe a aproba e ruta aki. Pues pa 1990 lo tin un ruta nobo.

Finalmente Comisario interino sr. Rasmijn a termina haciendo un yamada na henter pueblo di Aruba pa respecta e decision tuma aki, y laga nos hiba e carnaval di Aruba aki na un fin cu e merece.



Cu vuelo directo for Boston

Trans Continental Airline ta cuminsa bula pa Aruba

ORANJESTAD(AAN) -- Otro luna Aruba lo cuminsa ricibi vuelonan directo for Boston.

Ta asina cu e compania aereo Trans Continental Airline lo cuminsa efectua vuelonan directo charter pa Aruba.

Informacion cu DIARIO ta dispone di dje ta mustra cu Trans

Continental Airline cu un capacidad di 250 asiento lo ateriza tur Diasabra na Aruba.

Algun siman pasa, e representantenan di e compania tabata na Aruba caminda a hiba conversacion ariba e ruta di Boston pa Aruba.

Ta asina cu Gobierno

Mericano lo tin cu aproba e vuelonan aki cu posiblemente lo cuminsa dia 10 di Maart.

Mientrastanto Trans World Airline a cuminsa cu vuelonan for di Puerto Rico pa Aruba. Un total di 11 charter lo bin Aruba den horanan di madrugada caminda e avion ta yega yen y ta regresa bashi.